

Seiqgyaiq Gaep Feihyiz: Golaux Dungcuz

世界级非遗：侗族大歌

□ Cwngh Feihyinz Linz Yenz Vuz Lenyinh daengj raiz Dahdingz hoiz



▲ Vunzlai Dungcuz caez sing ciengq golaux Dungcuz.

▲ Bouxswncienz youq laj daiz sonyinx gyoengq canghgo iq biujyienj golaux Dungcuz.

◀ Gij ciengzmienh cien vunz caemh ciengq golaux Dungcuz.



▲ Gyoengq canghgo iq Dungcuz ciengq golaux Dungcuz gig ndeidingq.



▲ Dahsau Dungcuz ganj bae camgya hoih fwen.



▲ Golaux Dungcuz yienjok ciengzmienh hungmbwk raixcaix.



▲ Fwngz gaem yozgi ganj bae hoih golaux Dungcuz.

Golaux Dungcuz youq ranghdieg Mbanjdung henz Dahyungzgyangh Sanhgyangh Dungcuz Swciyen Guengjsae riuzcienz, dwg cungj hingzsik habciengq ndawbiengz lai sing bouh, mbouj yungh cijveih, mbouj yungh buenx ciengq, swhyienz hab sing ndeu. Cungj go neix bingzseiz youq gvaq ngoenzciet, doihgo sai mbwk naengh youq laeuzgyong roxnaeuz humx youq henz dongfeiz doiq ciengq, yungh go gangjok cingzgamj, haenh aenbiengz ndei.

“Haeux ciengx ndang, go ciengx sim” dwg coenz hauq vunz Dungcuz ciengzseiz gangj ndeu. Youq ranz Dungcuz, sing go dwg gij doih beksingq gvaq ndwenngoenz mbouj ndaej noix de. Laeuzgyong caijdangz miz go nauhdangz, gwn ngaiz miz go gingqlaeuj, couxhek miz go laengzroen, hoih fwen miz golaux Dungcuz……Youq Liuzcouh Sanhgyangh Mbanjdung ranghdieg henz Dahyungzgyangh Meizlinz, Fuluz, Yangzhih daengj, swncienz go Dungcuz gaenq mauhgvaq 2500 bi lizsij, de mboujdan dwg cungj hingzsik yisuz ciengqgo ndeu, hix dwg swncienz gij vwnzva Dungcuz caeuq cingsaenz de. Bi 2006, “golaux Dungcuz” ndaej liedhaeuj Cungguk feihvuzciz vwnzva yizcanj mingzloeg, bi 2009 youh ndaej Lenzhozgoz Gyaugohvwnz Cujciz liedhaeuj vunz-loih feihvuzciz vwnzva yizcanj mingzloeg.

Vuz Cunhyez dahsau Sanhgyangh doekseng youq ranz daihdaih cienz golaux Dungcuz ndeu, de daj iq da raen rwz dingq, riengz mehsimj Vuz Danvah bouxswncienz swcigih gaep haenx hag golaux Dungcuz. Vuz Cunhyez gyaemzmaij ciengqgo haenx deihdeih bae camgya gak cungj vwnzyi doxdax Sanhgyangh caiqlij Liujcouh, de biujyienj gig ndei ndaej daengz lauxsae aen cungsim feihyiz

louzsim. Ndaej gyoengqde haeuj-coengh, bi 2015 ndwen 10, Vuz Cunhyez baenz bouxswncienz feihyiz yienh gaep golaux Dungcuz, caemh-caiq byaij hwnj le diuzroen swncienz golaux Dungcuz.

“Aeu golaux Dungcuz cienz-ciengq daengz daengx guek gak dieg bae, ciengq ok douguek, hawj engq lai vunz roxnyinh gij ndei vwnzva Dungcuz, neix dwg aen simmuengh ciuhvunz gou.” Miz aen gietsim baenzneix, Vuz Cunhyez caeuq cejnuengx Dungcuz gapbaenz aen gyoebhab Sanhgyangh camgya gaiq daihcibsam CCTV canghgo bouxcoz densi daihciengj doxdax, aeu golaux Dungcuz nyuenz miz neix ciengq daengz Baekging.

Sanhgyangh Meizlinz Yangh youq henz Dahyungzgyangh haenx dwg dieggoek golaux Dungcuz, gizneix sai mbwk geq iq cungj rox ciengq go Dungcuz, hix gyaenz ciengq go Dungcuz. Doiq vunzlai Meizlinz daeuj dangj, binaengz ngoenzciet caiq nauhyied mbouj dwg ndwen-cieng, cix dwg ciet golaux Dungcuz liggaueq ndwenngieih co'ngieih. Hangh minzsuz hozdung beksingq Dungcuz dangdieg gagfat cujiz neix miz 200 lai bi lizsij, daengz seizneix gaenq banh le 127 gaiq, dwg gij caidij rengzrwd swncienz golaux Dungcuz. Binaengz ndwenngieih co'ngieih, youq ndaw sing venz hap-rwenz, golaux Dungcuz mbouj dingz mbouj duenh, vunzlai Meizlinz yungh go gyau youx, lienx bouxhek daeuj yawjngonz hix deng gij heiqaenh nauhyied neix yinxdawz, gyoengqde hix gyahaeuj daengz aendoih golaux bae lo.

“Youq Meizlinz Yangh, ciengq go Dungcuz dwg gij bingzciengz ndwenngoenz gyoengqvunz.” Aen Cungsim Baujhoh Caeuq Hwngfat Feihvuzciz Vwnzva Yizcanj Sanhgyangh Dungcuz Swciyen cujyin Liuz

Dwzyungz naeuz, gizneix moix aen Mbanjdung cungj miz aen doih caiqlij cibgeij aen doih golaux Dungcuz, gyoengqde aeu golaux Dungcuz ciengq ok mbanj, ciengq daengz gak aen ginggih Sanhgyangh caiqlij ciengq ok Guengjsae. Meizlinz Yangh hix aenvih neix okmingz, ndaej bingz baenz “aen dieg yisuz vwnzva ndawbiengz Cungguk”.

“Baujlouz caeuq swncienz golaux Dungcuz doiq cienzmienh hezdiuz hwngfat ginghci ndawbiengz vwnzva Sanhgyangh miz yi yi youq-gaenj, Sanhgyangh youq baujhoh caeuq swncienz Dungcuz vwnzva guh le haujai goengrengz.” Ciuq Liuz Dwzyungz gaisau, vih baujjang ngaenzcienz doh yungh daengz baujhoh caeuq swncienz golaux Dungcuz, cawz ceng'aeu guekgya caeuq swcigih binaengz 200 lai fanh maenz ngaenzcienz cienhangh, Sanhgyangh lij bued le bak lai fanh maenz yungh guh baujhoh feihyiz golaux Dungcuz. Linghvaih, Sanhgyangh cwngfuj caeuq aen cungsim feihyiz lij youq Sanhgyangh cungsim siujyoz caeuq Meizlinz Yangh Sinhminz Cunghcai laebbaenz aen dieg swncienz feihyiz golaux Dungcuz, doenggvaq langhbaiz, swncienz, son'gyauq, hwnjdangz daengj fueng-sik gungganq bouxswncienz golaux Dungcuz. Daengz seizneix, Sanhgyangh miz guekgya, gih, si, yienh seiq gaep bouxswncienz feihyiz golaux Dungcuz 16 boux. Golaux Dungcuz hix ciengzseiz ndaej camgya gak cungj doxdax caeuq yienjok Liujcouh, Guengjsae caiqlij daengx guek. Sanhgyangh lij banh ciet Dohyeh Dungcuz, ciet golaux Dungcuz daengj hozdung ndei yawj dem, binaengz miz ca mbouj geijlai 500 fanh bouxhek bae daengz Sanhgyangh roxnyinh gij vwnzva ndei Dungcuz.